





SERENISS. PRINCIPIS  
**A L B E R T I**

AVSTRIÆ ARCHIDVCIS VII.


BRABANTIÆ DVCIS I.

LAVDATIO FVNEBRIS:

D I C T A

A L A V R E N T I O B E Y E R L I N C K  
Canonico & Archipresbytero Ecclesiæ  
Cathedralis Antuerpiensis,

In exsequiis eiusdem ibidem honorificè celebratis ab  
vniuerso Clero, Senatu & Populo, die XIX. Augusti,  
anni M. DC. XXI. postquam ille viuere desiisset  
Iulij præcedentis die XIII.



A N T V E R P I Æ,  
EX OFFICINA PLANTINIANA.  
M. DC. XXI.



Digitized by the Internet Archive  
in 2017 with funding from  
Getty Research Institute

A M P L I S S I M I S

A C

PERILLVSTRIBVS DOMINIS

P R Æ S I D I

E T

S E N A T O R I B V S

S A N C T I O R I S C O N S I L I I

I N B E L G I O

L A V R E N T I V S B E Y E R L I N C K

Canonicus & Archipresbyter Ecclesiæ

Cathedralis Antuerpiensis,

se & hæc suadecat consecratque.



S E R E N I S S I M I *Archiducis*  
A L B E R T I , *desideratissimi*  
P R I N C I P I S *nostri*. heu pri-  
dem erepti exsequias hęc inimus,  
A M P L I S S I M I D O M I N I ,  
& in ijs L A V D E S lacrymis mi-  
stas more & amore dedimus. Vtrasque ad A M-  
P L I T . V V . fero; & ut adferrem, titulus & argu-

A 2

men-

mentum ducebant. LAUDES sunt laudatissimi  
 PRINCIPIS, & quæ desiderium extincti repo-  
 nant, LACRYMÆ. Neque aliis quàm Vobis de-  
 bebantur, qui in alto illo culmine Olympum hunc  
 sustinetis, quem is humeris vestris imposuit: &  
 cuius etiam, dum adhuc viveret, simulacrum pru-  
 dentia & integritatis splendore extulistis; quem  
 nunc mortalitate defunctum, ceu Parentem alte-  
 rum (ita iure omnes debemus) lugetis. Si quæ voce  
 aut stylo per me omissa (quis enim finis aut modus  
 in inuio hoc laudationis salo?) aut verbo solum  
 emissa, in animos vestros excutienda immittite;  
 & postumam hanc erga Optimum Piiſsimum-  
 que PRINCIPEM cultus mei pietatem, & cum  
 eâ deuoti erga AMPLIT. VV. adfectus monu-  
 mentum admittite. Antuerpiæ, VIII. Kal. Sep-  
 temb. anni M. DC. XXI.



SERENISS. PRINCIPIS

ALBERTI

AVSTRIÆ ARCHIDVCIS VII.

BRABANTIÆ DVCIS I.

LAVDATIO FVNEBRIS.



N ad luctum redimus, AN-  
TISTES REVERENDIS-  
SIME, & lacrymas quæ ex  
nupero funere PHILIP-  
PI III. Regis Catholici,  
oculis adhuc hærent, ino-

pinatò resumimus, omnisque ad repetitas ex-  
sequias sexus & ætas venit, atque non tam ad  
hæc nouæ pompæ miracula spectanda, quàm  
ad communem Orbis Christiani orbitatem  
deplorandam certatim accurritur. Adestis ne-  
ciam cantaturi REVERENDE, NOBILIS,  
ac RELIGIOSE COETVS. Adestis Belgicæ  
nostræ, & ciuitatis huius luctum, & pietatem

6 SERENISS. PRINCIPIS ALBERTI  
vestram, erecto hoc in loco honorarij tumuli  
mausoleo testaturi, atrati SENATORES.  
Quin & augustissimæ huius Aedis vestitus  
concolor dolorem auget, & suspensa sacratis  
turribus æra querulo murmure cælum pul-  
sant. Cælum etiam ipsum nouo hoc funere,  
obortis subitò densioribus nimbis, in lacrymas  
resolui videtur. O inauspicatum nuperi si-  
deris portentum! O dirum mortalibus omen,  
Cometam! Non sine causâ, dum infestam nu-  
per facem panderet, vultus in cælum erexi-  
mus, tenuitque sollicitos omnium animos,  
dum per continuas noctes statione seruata ad  
nos rediret, cui tandem exitia & clades desti-  
naret. Quippe non vno funere expiatae illius  
minæ, in Principum capita desequiit, qui tristis-  
simum illius aut fatum, aut nuntium ineuita-  
bili necessitatis lege exceperunt. Hactenus  
enim & MATTHIAM Cæsarem inuictum,  
eiusque fratrem MAXIMILIANVM, Princi-  
pes potentissimos; mox PAVLVM V. verè  
Optimum Maximumque Pontificem; PHI-  
LIPPVM denique III. Regem Catholicum  
feralis coma obuoluit: donec versata tandem  
Prin-



Principum virorum vrnâ, egressa fors, Sere-  
nissimum Archiducem ALBERTVM PRIN-  
CIPEM nostrum, inter bonos Principes  
optimum, inter pios sanctissimum, inter  
fortes maximum, inter egregios prudentissi-  
mum, clementissimum, & publicæ quietis  
amantissimum terris eripuit, cæloque reddi-  
dit. Regnator omnium Deus, cuius obstetri-  
cante manu tortuosus coluber educus hanc  
molem ambit, cui signa cæli famulantur, hoc  
cine ad potentiæ tuæ miraculum deerat, ut  
flos ille Principum, gemma Ducum, vnicum  
Belgarum, imò & humani generis delictum  
ALBERTVS moreretur? & quidem eo tem-  
pore moreretur, quando calamitatum om-  
nium pænè obliti, tranquillitatis diu expecta-  
tæ commodis fruebamur; & ut vltra frueremur,  
sperare nos iubebat PRINCIPIS inte-  
gritas, & in omnes beneficentiæ pacisque stu-  
dium: cùm nunc eo ablato, solitis furiis ex-  
cienda timeatur hostium perfidia, belli que fa-  
ces semel extinctæ, apertis Iani foribus, accen-  
dendæ existimentur.

— *Sed quid Pietas irata sinistris*

*Celi.*

*Caliculis furit? —*

Iob 8.

*Numquid Deus supplantat iudicium? aut omnipotens subvertit quod iustum est?* Immobili lege humanarum rerum ordo feritur: cui obsistere velle, stultum esto; obmurmurare, impium. Hanc vitæ conditionem sumpsimus, vt quam nascendo accepimus, deponamus iubente & repetente magno illo Stratego: cuius prima lex, stare decreto. Verùm impotentior ea medicina est ab inuictâ necessitatis regulâ desumpta, vt iacturam nostram refarciat, quam tanti PRINCIPIS orbitate fecimus; vt dolorem leniat, quem tam funesto funere excepimus. Amisimus non tam PRINCIPEM, quàm PATREM; non tam Dominum, quàm contubernalem: & bello & pace inclytum DVCEM. Cuius in cultu, sensu, sermone modestiam, in moribus grauitatem, in agendo prudentiam, in præcipiendo æquitatem, in exsequendo clementiam, splendorem in publicis, in priuatis moderationem, pietatem erga Deum, Diuos, Tempia; beneficentiam erga omnes, ceteri Principes quibus ille ad has virtutes exemplum fuit, mirabuntur faciliùs, quàm

quàm imitabuntur. Nos certè dum ea refricabimus, oblectabimur quidem memoriâ illius, quòd talem ac tantum Principem habuimus, vnicum ceterorum Principum phœnicem; qui & famâ fruetur quam meruit: sed dolorem eò ampliùs exulcerabimus, quòd frequentiùs moderationem quâ præfuit, exemplum quo profuit, solatia quæ adtulit, calamitates quas abstulit, oculis subiiciemus. O \* diem deteriore <sup>\* 13. Iul.</sup> lapillo munerandum! occupet eum caligo, & <sup>1621.</sup> inuoluatur amaritudine, quo acerbus elongatâ nobis discessus tui PRINCEPS SERENISS. nuntius aures omnium verberauit, téque mortalitatis farcinâ exutum, querulâ voce significauit. Diem, inquam, qui quòd nobis exstitit acerbior, eò exspectationi tuæ cumulatior; quando ad originem tui reuersus, illibatum felicitatis æternæ decus, quod in terris, vitam sine labe ducendo, quæsiuisti, es consecutus: eoque nauigium appulisti, vnde nulum deinceps naufragium pertimescas.

Agite igitur AVDITORES, cælo receptus ARCHIDVX ALBERTVS hanc obsequij nostri pietatem intuetur. Tibi PRÆSVL Reueren-

IO SERENISS. PRINCIPIS ALBERTI  
uerendiss. vobis *Reuerendi Domini, ac Religiosi*  
*Patres*, & Amplissimo huius vrbis *Senatui*  
*Populoq;* exsequias eunti, gratias agit maxi-  
mas, maiores patrocínio suo apud commu-  
nem Deum relaturus; quòd tantâ deuotione,  
tam pio adfectu, tam religioso cultu, deuotio-  
nem, adfectum, cultumq; quem superstiti  
exhibuistis, etiam maiorem postquam super-  
esse desiit, vltro exhibeatis. Et quamuis non  
nisi humilem sarcophagum tumulumq; quo  
corporis reliquiæ conderentur, sine titulis aut  
purpuræ notâ, extremis testamenti tabulis,  
quâ erat modestiâ, postulauerit; facitis tamen  
quod PRINCIPÍ optimo, quod PARENTI  
meritissimo, quod clementissimo DYNASTÆ  
facere debetis, Ampliss. CONSVLES; incerti-  
num parem obsequij funebris pietatem vm-  
quam aliàs sitis impensuri. Neque deerit quæ  
isthæc charitatis officia rependat. non enim  
totus à nobis abiit ALBERTVS, non totus  
discessit. habemus paternæ sollicitudinis pi-  
gnus, & velut amoris obsidem Serenissimam  
coniugem, HEROINAM inter omnes sui se-  
xus verè Principem, comitate & benignitate  
erga



erga omnes, magnæ illius ISABELLÆ Diuorum catalogo inscriptæ, æmulam : pietate & deuotione in Deum & Sanctos, CLARAM: generosæ indolis nobilitate, EVGENIAM. hæc enim nomina iam olim recens natæ obtigerunt, quòdeam mater ISABELLA VALESIA, HENRICI II. Galliarum Christianissimi Regis soror, pridie dici qui B. virgini CLARÆ sacer, eniteretur: sub quod etiam tempus potentissimus Regum PHILIPPVS II. pater, Anno  
 sacras diui EVGENII Martyris & Episcopi 1566.  
 Toletani reliquias, è Galliâ in Hispaniam translatas, amplissimo apparatu, cultuque religiosissimo, humeris Regiis sacræ sarcinæ subiectis, quod omnem pompæ amplitudinem excedit; haud secùs quàm Dominicam Crucem Heraclius Imperator ex Perside restitutam, Ierosolymam; in pristinam suam sedem ædemque intulit. Itaque non est quòd animum despondeamus, dum salutaris hæc VRANIA Belgicæ adspirabit: quæ velut imperio cum defuncto coniuge diuiso, dum ille cælum tenet, hæc nostra moderabitur, impressâ cum suâ, vt quam Deus & Natura ei largâ manu

indulserunt, tum maritalis virtutis imagine. Tollet ergo (spem non modò, sed & fiduciam concipimus) tollet inquam, aut sustinebit imminetia nobis bella ISABELLA: improvisam impendentemque periculorum nubem serenitatis suæ radiis CLARA dispellet: & creditum sibi populum generoso benevolentiae sinu, ut nomini suo respondeat, EVGENIA complectetur.

Sed quò feror? Iussus eram sollenni hac funeris frequentatione laudatissimi PRINCIPIS emeritas laudes, & ex iis luctum persequi, neque id *mercede, quâ conductæ flent alieno in funere Praeficæ*; aut fictâ, sed verâ pietate, quam amisso PARENTI debemus; & penè in gratulationem excurreram & plausum. Adeò trepidè munus hoc laudationis tanti PRINCIPIS suscepi, ut nisi recusandi pudor audacem redderet, numquam hanc celocem tam vasto narrationis pelago commisisssem, quam vereor nimio dicendorum æstu sorbendam. Verùm cùm apud illos dicerem, quibus tanti PRINCIPIS virtus iamdudum affulsit: eo loco dicerem, ubi ille munificentiae suæ nuper exsta-



re voluit insigne monumentum, quo Collegij huius censum annuum, fundi quem fortuita diluies olim merferat, accessione ( nisi fortè malignitas temporum huic Pietati etiam obsistat ) augeri, & ex hac statione egresso suffragiorum adminicula impendi iussit: denique is ego dicerem, apud quem egregio donatiuo eiusdem PRINCIPIS beneficentia se aliquando effudit; vela explicavi, & quod Cræsi filio accidisse legimus, vt naturâ elinguis in verba prorumperet animosâ sicarij in patrem comminatione permotus, fiduciam mihi comparavi, vt in hoc æquor descenderem, & confusè viam aliquam laudationi designarem.

Etenim si ab ipsis ALBERTI PRINCIPIS nostri primordiis velut è portu soluero, & per Austriacæ gentis triumphos & altioris Genij Principes, quorum per augusta Imperia numerantur aui, qui Leges, Reges, Cæsares dederunt, ratem hanc deduxero, nullum vmquam finem inueniret narratio. Non enim à fabulosis commentis eius cunabula ad Herculem Priamumque deducta auspicarer; sed ad potentissimos Galliarum Reges, & Habsburgicorum

Comitum veterem & perillustrem profapiam, primam generosi huius sanguinis indolem referrem. Dicerem quoque RVDOLPHOS, ALBERTOS, MAXIMILIANOS: dicerem FERDINANDOS, CAROLOS, PHILIPPOS, quibus, vt omittam trophæa innumera, ad gloriã satis sit, quòd iam dudum

--CHRISTIADVM *mutaret pondere moles,*  
*Ni foret AVSTRIACÆ gentis suffulta columnis.*  
 Equidem

*Te decet Imperium, gens AVSTRIA, fortiter illo*  
*Vsa diu.*

Quippe à RVDOLPHO ALBERTI cognomento SAPIENTIS filio, qui notâ in Sacrorum ministrum extremum viaticum ægro deferentem pietate, stirpem hanc propagauit, intra trecentos hos circiter annos, XII. IMPERATORES Occidentis per ætatum successiones numeramus; quorum eminentia facta, quibus orbi Christiano affulserunt, posterio loquentur, & ad feros nepotes transmittent. Fuit autem inter hos MAXIMILIANVS II. FERDINANDI primogenitus, optimus Imperator, Archiduci ALBERTO parens, cuius  
 in

in Rempub. Christianam egregia merita, licet  
 tacuerimus nos, frequentes aduersus AV-  
 STRIACI sanguinis immanissimos hostes vi-  
 ctoriæ & triumphî, ac plurium insuper Re-  
 gnorum felicia incrementa (nam vix vnico an-  
 no exacto, tres ordine coronas accepit) dura-  
 turo elogio decantabunt. Coniugem habuit  
 MARIAM CAROLI istius V. filiam, PHI-  
 LIPPI II. Catholici germanam, cùm naturæ  
 tum animi ornamentis excultam Heroïnâ,  
 ac matronalis verecundiæ custodem fidelissi-  
 mam, & ex eâ liberos xv. raro fecunditatis ex-  
 emplo, rariore Dei beneficio, sustulit. è quibus  
 RVDOLPHVS & MATTHIAS nuper Im-  
 perij fasces tenuerunt: ERNESTVS vtriuf-  
 que Pannoniæ, & Belgicæ dein nostræ mode-  
 ratione nuper eheu! perfunctus cum vitâ et-  
 iam fuit. à MAXIMILIANO quoque altero  
 filio, quem Teutonici Ordinis & stemmatis  
 Proceres in supremum administrum adsciue-  
 rant, tributum suum insuper natura exegit.  
 Archidux verò ALBERTVS prioribus super-  
 stes, illorum quoque famam benè factorum  
 gloriâ extendit, dum docuit sempiternam, &  
 panè

pænè inuiolabilem suæ Gentis fecunditatem, nouarum semper virtutum accumulatione locupletem. Natus est autem ALBERTVS inter Austriæ Archiduces eius nominis Septimus, in nouâ Austriæ ciuitate quam Neostadium vocant, anno post incarnatum Verbum nono & quinquagesimo supra millesimum & quingentesimum, mensis Nouëbris die XIII. quo etiam die Q. Fabium Max. Consulem, memorabilem triumphum duxisse, veterum Annales prodiderunt. Renatus saluari aquâ & Spiritu sancto, nomen ALBERTI accepit; quòd eum cognominem B. ALBERTO Ratisbonensi Episcopo, quem summa eruditionis omnigenæ gloria vniuerso orbe MAGNUM esse & appellari fecit, piissimi progenitores desiderassent: nisi altiùs huius nuncupationis originem ad primos, longâque Archiducum serie succedentes Austriæ Archiduces transmittamus: quibus ALBERTVS iste posthumâ virtute si non præluxit, certè velut coruscum aliquod sidus illuxit: nequedumtaxat oris mentiç; similitudine ( hanc enim à Franciæ Regibus ad huius stemmatis Principes deriu-

Anno  
1559.

riua-



riuatam ferunt) Austriacos expressit, sed magis exemplo, quiq̃ue felicissimè ei crebrò ob-  
 tigit, maximarum rerum euentu. Qui primus  
 Imperij fasces cum Archiducis titulo tenuit,  
 ALBERTVS fuit ex RVDOLPHO etiam  
 Primo. Sed qualis ALBERTVS? XII. prælio-  
 rum victor, re & agnomine TRIVMPHA-  
 TOR. Qui huius nominis Secundus Austriam  
 gubernauit, stirpemq̃ue pænè collapsam pro-  
 pagauit, SAPIENTIS cognomen meruit, &  
 solus Austriacarum ditionum heres fuit. Ter-  
 tius Archidux ALBERTVS, à capillorum  
 propendentium iubâ CVM TRICA dictus,  
 bella quæ suæ genti cum Bauariæ Ducibus  
 erant, compescuit: optimarum artium egre-  
 gius admirator & amator, Gymnasium quod  
 Viennæ hodie floret, exstruxit, & annuo vecti-  
 gali instruxit, DOCTIQ̃UE titulum affecutus  
 fuit. Quartum ALBERTVM rara Pietas ex-  
 tulit, quâ in Palæstinam, loca vbi pedes Do-  
 mini steterunt adoraturus, excurrit. Sed &  
 Procopij facinorosam manum, quâ Morauiam  
 infestabat, numerofo exercitu fudit, PA-  
 TIENTIS & MVNDI MIRABILIVM nun-  
 C cupa-

18 SERENISS. PRINCIPIS ALBERTI  
 cupationem fortitus. Qui autem primus Re-  
 gnum Bohemiæ armato milite ingressus, Pro-  
 ceres pro Casimiro Polono rem agentes (fata-  
 les namque huic Regno tumultus cum Regi-  
 bus) subegit, & Imperio quod obtinebat adie-  
 cit, ALBERTVS V. fuit, cognomento HO-  
 NORIFICVS. Sunt qui RELIGIOSVM ap-  
 pellent, à demissâ sanctimoniâ, quâ & officia  
 Ecclesiastica cum Clericis persolvebat, &  
 Hymnos in publico concinebat. Sextum à li-  
 beralitate, quæque Principem ornat clemen-  
 tiâ, MITEM, & NIMIE-LIBERALEM, ab  
 huius virtutis excessu dixere. Definiuit AL-  
 BERTORVM non nomen modò, sed & virtu-  
 tum insignia ALBERTVS Septimus Austriæ,  
 Burgundionum & Brabantiae Primus DVX:  
 vt qui pulso Antonio notho, Lusitaniæ Re-  
 gnum affectante, classeque memorabili fuga-  
 tâ quâ Vlyssiponam adoriebatur, vt omittam  
 hoc loco Belgicas expeditiones, & auspicata  
 stratagemata, & inducias funesto huic insuper  
 bello præstitas, TRIVMPHATORI iure cense-  
 bitur. Quin & SAPIENTEM, DOCTVM,  
 PATIENTEM, MVNDI MIRACVLVM,  
 HONO-

Anno  
 1589.



HONORIFICVM, RELIGIOSVM, MAN-  
SVETVM, MVNIFICVM, adeoq̃ue Maiorum  
sibi cognominum titulis imaginibꝫq̃ue illu-  
strem, quæ porrò adferenius domi militiæq̃ue  
gesta, demonstrabunt: scietq̃ue omnis poste-  
ritas, inter Austriæ Archiduces Septimum, in-  
ter Brabantia & Belgarum Principes Primum  
hoc tempore ALBERTVM fuisse, cui prioribus  
auorum titulis Pietas, Pacisq̃ue ardor no-  
men addiderit, ALBERTVM PIVM & PA-  
CIFICVM indigetauerit.

Tranfactis itaque in summo Cæsareæ maie-  
statis splendore, inter maxima Imperij deco-  
ra ætatis tyrociniis, primos & floridos annos  
politioribus studiis consecrauit: vt iam Latini  
sermonis puritatem calleret, vernansq̃ue inge-  
nium in decurrendis præteriti temporis An-  
nalibus, & qui ad Christianam virtutem, quò  
viuendo peruenire à cunabulis summopere  
contendit, impellerent, Scriptoribus versandis  
desudaret. Exhinc in litteras & litteratos pro-  
pensus, ingenia artesq̃ue, quod Vespasiano lau-  
di datur, fouit vel maximè: cuius testes pro-  
ducerem Belgicas Athenas, Louaniensem

Academiam, nisi omnibus in ore esset, quâ prudentiâ, quâ prouidentiâ non ita pridem sacrarum profanarumque litterarum Prælectoribus annua salaria luculentiora hîc constituerit, dignitates quoque & honestissima congiaria detulerit. Quid exspectemus, quàm egregiam illam & regiam Leonis Græcanici vocem & votum? *Vtinam meis temporibus eueniat, ut militum stipendia in doctores artium absumantur!* Eueniat, ô Principes! neque maius vobis, subditisque præsidium, quàm ab hac palæstrâ. Latinitati aliorum quoque idiomatum peritiam adolescentes anni in ALBERTO iunxerunt, ita vt neminem mirari oporteat, & velut stupere in vnico Mithridate, quòd variorum Principum & Gentium Oratores, proprias natalis sermonis dialectos ac vocem depromentes admitteret, & sine interprete expeditos à se dimitteret. Siquidem selectiorum Scriptorum reuolutione imbuebat animum, quoties à grauissimis negotiis feriabatur: sollicitus non tam de Regiis Palatij ornamentis, quàm de Palladij eruditioribus libris. quorum etiam dum apud nos fuit, raram magis, quàm

amplam supellectilem, ne dicam thesaurum  
 congeffit, vt etiamnum fupra tria volumi-  
 num millia in librario confpiciantur. Sentie-  
 bat fapientiffimus PRINCEPS, quod ante il-  
 lum ALPHONSVS Aragonum Rex fenfit,  
*Optimos confiliarios effe libros, à quibus fine metu,*  
*sine gratiâ, quâ noffe & fcire cupimus, ex fide &*  
*integrè accipimus.* Arma quoque & armorum  
 iura in his proponi, & velut in fpeculo vul-  
 tum, ita & mentem componi ad alienam vir-  
 tutem. De Alexandro Plutarchus testatum  
 reliquit, maioribus eum à præceptore Aristo-  
 tele, eiuſque præceptis, quàm à Philippo patre  
 præſidiis inſtructum, in Perſas mouiſſe. Qua-  
 re quod de Auguſto Cæſare Auſonius, de  
 Principe noſtro iure dixerimus:

*Bellandi fandiq; potens ALBERTVS, honorem*  
*Bis meret, vt geminos titulos; qui prælia Muſis*  
*Temperat, & Geticum moderatur Apolline*  
*Martem.*

Educatus inter proſperioris fortunæ blandi-  
 menta ALBERTVS, exemplo iam ſuo doce-  
 re cœpit, etiam inter aulæ ſtrepitus luxumque  
 ſacraria eſſe, è quibus ſanctiſſima vitæ institu-



ta deriuentur , dum ille in maximis opibus temperantiam , in voluptatibus quæ has comitantur pudicitiam , in vitæ libertate continentiam exerceret , & adfectus ipsos in potestate haberet. Neque enim superior aut nostra ætas ignorat , summam in sensu pariter & cultu modestiam , quam ille adsumpsit etiam in alto constitutus , & obsecundante fortunæ vento. Nihil adulationi , prô omnium aularum pesti ! nihil consultoribus , præterquam ad virtutes Principe dignas, detulit, vnus animi, qui dux & Imperator vitæ est mortalium, culturæ attentus. Nec enim vllis vmquam illecebris, quas prona in vitium natura in sinum colligit, habenas laxauit, vt ijs non dico non succumberet, sed neque incumberet aliquando; in tantum recti peruicax, vt quid in moribus distortum ignoraret. Quid? quòd memor fragilitatis huius, quâ summos perinde atque imos æquari sciebat , postquam Archiducatum Austriæ, & dependentes inde Prouincias MATTHIÆ fratris & Cæsaris morte ad se deuolutas, cum Imperio ab Electoribus delato, FERDINANDO reliquisset; ô Archiducem

cem melioris æui! extremum id etiam voluit,  
 vt exanimum corpus suum, quando iubente  
 Deo tale foret extra Ducalem suam urbem  
 Bruxellam, in Palatium deduceretur, stipa-  
 tum humili comitatu, & XIII. dumtaxat fu-  
 nalibus accensis, quorum XII. è communi ce-  
 rà ad memoriam Apostolici numeri, albican-  
 te decimo tertio in Deiparæ Virginis hono-  
 rem, deferretur. Aderat nihilominus cum  
 hac moderatione vultus immoti in aduersis  
 perinde ac prosperis reuerentia, quam totâ vi-  
 tâ retinuit. ita, vt quamuis accessu facilis, ser-  
 mone comis, alloquio blandus esset, nihilomi-  
 nus accedentibus venerationem, locuturis  
 formidinem, anxietatem temerariis, solâ com-  
 positi vultus maiestate incuteret. Castitatem  
 autem, magnum, quia rarum, Principum or-  
 namentum, ita rigidè ante coniugium, & in eo  
 seruauit, vt etiam foedus pepigisse cum oculis  
 suis videretur, vt ne cogitaret quidem de vir-  
 gine, & ne leuem quidem obscœni rumoris in  
 se fabulam daret. Recolebat Bacchylidis poë-  
 tæ dictum: *Vt egregius pictor speciosum vultum*  
*effingit, sic pudicitia celsius consurgentem vitam*

*exornat.* Hæc tamen virtus non in PRINCIPLE nostro solùm fuit, sed à gentis radice propagata in hunc ramum defluxit. Siquidem MAXIMILIANVM Primum Austrium sic verecundum ab illicito contactu & adspectu extitisse perhibent, vt cùm corpore esset pulcherrimus, nemo eum viderit detectum, aut nudum. neque erat ab hac mente alienus ALBERTVS: vt qui numquam se resectum contingi passus ab his, quorum ministeria in aliis admittebat; & tertio ante mortem die, vni illorum in mandatis dederit, mortuo sibi feminalia priùs induceret, quàm exenterari cadauer contingeret. ita magnum illum Cæsarem,

*Ad sua qui domitos deduxit flagra Quirites,*  
 sinum ad ima crura deduxisse, vt confossus honestiùs caderet, & inferiorem etiam corporis partem velasse, auctor est Suetonius. O curam pudoris, etiam cùm abesset pudor! Hinc si quos alienum torum violasse, aut illicitis amoribus detineri, rumore acceperat, nullâ interpositâ morâ à conspectu suo, imò & Palatio excedere iubebat, publicisq̃ue muneribus



bus indignos censebat. quomodo de BAL-  
 DVINO ex Flandriæ Comite Byzantij Impe-  
 ratore referunt, quòd bis qualibet hebdoma-  
 de per præconem edixerit, ne quis in Palatio  
 pernoctaret, qui alienam mulierem attigisset.  
 Castitati pietas præsidio erat, quæ si in vllò ex  
 magnâ illâ stirpe, singularis in hoc ARCHI-  
 DVCE fuit. Pietatem voco Deicultum, quem  
 εὐσεβειαν Græci: qui tamen & erga parentes S. August.  
lib. 10. De  
civit. c. 1.  
 officiosè se habet. Erga vtrosque habuit Ar-  
 chidux ALBERTVS. Et vt eam hoc loco præ-  
 teream, quam in Deum variè testatus, magis  
 opportuno mox adserendam; Parentibus non  
 in tenerâ modò ætate, verùm remoto iam cu-  
 stode, & bullâ Dîs laribus donatâ ita obsecu-  
 tus fuit, vt à PHILIPPO II. Rege, & auun-  
 culo, apud quem inclyti eius nominis & indo-  
 lis fama percrebuerat, euocatus, in Hispaniam Anno  
1570.  
 cum sorore ANNA concesserit. Vbi septen-  
 nium propè commoratus, à GREGORIO XIII.  
 laudatissimo sanctissimoque Pontifice, S. R. E. Anno  
1577.  
 titulo S. Crucis Ierosolymitanæ Cardinalis in-  
 stitutus, purpurâ donatur, totius Regni, & Va-  
 ticipani Collegij applausu. Ceterùm PHILIP-

P V S II. eum fore ratus, qui sustinendo amplissimæ Monarchiæ oneri humeros velut Atlas aliquis accommodaret, vt qui in rebus maximis prudentiam, in periculosis prouidentiam peritiamque notissimis exemplis prodidisset, amplissimos eidem honores decernit, & verecundè abnuenti ingerit.

Erant ea tempora, quando cæso in Africâ SEBASTIANO Lusitaniæ Rege, qui Muletum Regno suo per Abdemelechum patrum fugatum, iuuenili impetu restituere aggressus fuerat, Proceres ad alienum sceptrum viduata deferre agitabant, nunc in Antonium Ludouici, seu vt alij, Aloisij, de Crato filium notum, nunc in alios inclinantibus suffragiis. Plerique autem PHILIPPO Regi Lusitaniæ diadema hereditariò competere, extincto præsertim paulò etiam post SEBASTIANVM Regem, HENRICO SEBASTIANI propatruo, S.R.E. Cardinale, asserebant; quando PHILIPPVS ab HENRICO Cardinale designatus, & à saniori Procerum collegio iure denuntiatus successor, ingenti & qui fidem excedat apparatu, cui Ferdinandum Aluarez de Tole.

Anno  
1578.

Toledo Albæ Ducem cum imperio præfecit, Lusitaniam ingressus, Vlyssiponenses Antonio adhærentes ad obedientiam, Antonium glande plumbeâ faucium ad turpem fugam adegit, armis & viribus exuit, Regnoque positus intra dierum LXX. spatium fuit. Verùm priusquam in Hispaniam, vnde triennium abfuerat, victor rediret, PHILIPPO III. filio & herede in Regni successorem prævio Ordinum assensu instituto, ALBERTVM CARDINALEM cum Proregiâ potestate Regni Anno 1583. istius moderatorem designauit. Qui ad eam prouinciam adscitus, tantâ fortitudine, prudentiâ, integritate, annos continuos decem habenas illius inflexit, vt nemo esset, qui non ad nomen Proregis exultabundus prosiliret, pristinæque calamitatis obliuisceretur. Prætereo quâ mansuetudine hærentes animis discordiarum fibras euulserit : quâ dexteritate rebellionis intestinæ fluctus composuerit, non commemorabo. Tacebo insuper, quia ad alia festinat oratio, quâ vigilantîâ piraticam classem, quam Franciscus Draco & fugatus Antonius, Vlyssiponam deuoraturi propelle-

Anno  
1589.

bant, terga vertere coëgerit. Hoc dicam: P H I L I P P V M Regem prudentissimum, Proregis sui virtute excitatum, amplioribus iterùm titulis eum destinasse. nam postquam mortalem hanc cum meliore vitam commutasset Cardinalis Q V I R O G A, eiusque morte Toletanæ Ecclesiæ prima Cathedra Rectore destitueretur, Madritum venire iussum A L B E R T V M, Ecclesiæ istius Antistitem, & Hispaniæ Primatem, ipse venienti obuius, adiecto mox Prioratu Ocratano, salutavit; & ad rerum status Consilium adscito, atque Apostolici Legati prærogatiuâ à C L E M E N T E V I I I. Pontifice donato, P H I L I P P I filij sui venientes annos supposuit. O Principem verè hæctenus magnum! sed in his quæ supersunt dicenda, maiorem!

Anno  
1593.

Dum hæc in Hispaniâ geruntur, Belgicarum Ditionum status imbecillior, repetitis eorum aliquot qui clauo hîc assidebant funeribus, indies euadebat. Scitis A V D I T O R E S, & nimiùm eheu! scitis, quòd ex quo P H I L I P P V S I I. in Hispaniam discessit, quibus calamitatum tempestatibus, & ciuiliu bello-  
rum



rum procellis iactata fuerit hæc Reipub. Belgicæ, quæ florentissima olim, dum longâ pace floreret, nauis. Lubet ingeminare illud Threnorum: *Facta est quasi Vidua domina gentium:* Cap. 1.  
*Princeps populorum facta est sub tributo. Facti sunt hostes eius in capite, inimici eius locupletati sunt, Sacerdotes eius gementes, Virgines eius squallida, paruuli eius ducti sunt in captiuitatem ante faciem tribulantis. Misericordia Domini, quia* Cap. 3.  
*non sumus consumpti.* Ceterùm Rex PHILIPPVS, memorabili victoriâ cùm ad Fanum S. Quintini, tum ad Greuelingam de Galliarum Rege obtentâ, & velut spoliis onustus, rebus omnibus hîc prudenter compositis, & in altissimo felicitatis culmine constitutis, secesserat, delatâ regiminis potestate EMANVELI PHILIBERTO Sabaudix Duci: cui post quadriennium digresso, MARGARETAM OCTAVII Parmæ Principis coniugem suserat. Sed exoriri hac Regente, intestina quædam dissidia cœpère, belli quæ exiguæ faces, ex prætensâ à quibusdam factiosis non minùs, quàm facinorosis, Religionis libertate, accensæ, domesticum ignem, qui mox in tabulata

30 SERENISS. PRINCIPIS ALBERTI  
tectumque defæuiit, excitarunt. Cui restin-  
guendo cùm REX ipse profectiōem pararet,  
& fecisset profectò, atque vtinam fecisset! nisi  
imperatorum consiliis dissuasus, FERDINAN-  
DV M Albæ fortissimum bello Ducem, cuius  
suprà cum elogio meminimus, reuocatâ post  
octo annorum regimen MARGARETA, cum  
exercitu misit. Sed cùm ille hoc Belgicæ vul-  
nus ense recidere, & ab integrâ parte gangræ-  
nam repellere, insuetâ Belgis seueritate (quæ  
cum delectu, & maturè, nonnumquam Rei-  
publicę causâ adhibenda est) contendit, omnia

*In peius ruere, & retrò collapsa referri.*

Excepit ergo imperium Albani LVDOVICVS  
REQVESENIVS, Castellæ Regni Commen-  
dator (militiæ is titulus est) quod Medinæ  
Cæli Princeps cum classe aduectus, suscipere  
detraçtauerat. Verùm REQVESENIVS, trien-  
nio nondum exacto, vitâ & imperio defun-  
ctus, Belgij Ordinibus mandato regio fasces  
reliquit, donec IOANNES AVSTRIACVS  
hac Præfecturâ donatus, & victoriâ hîc apud  
Gemblacum de rebellibus, & alterâ priùs ad  
Naupactum de Turcis magis celebri clarus,  
imma-



immaturâ morte abreptus , laceram Belgicæ carinam , & iam puppi proraque destitutam , magno illi ALEXANDRO FARNESIO , cuius virtuti & fortitudini impar omnis oratio , reficiendam interpolandamque , quod munus annis XVI. cum laude exercuit , commisit . Successit Farnesio Principi PETRVS ERNESTVS Mansfeldiæ Comes , sub CAROLO V. Cæsare in Tunetanâ expeditione armorum Præfectus , longo rerum vsu venerabilis senex . nam annum LXXX. excefferat : sed annum vnicum emensus , ERNESTO Archiduci ALBERTI Cardinalis germano hæc gubernacula concessit . qui sanè Princeps , quâ erat moderatione , industriâ , consilij maturitate hos tumultus repressurus fuisset , nisi abrupto velut à texente vitæ stamine , vix vndecim mensium Præfecturæ superuixisset . Eo mortuo PETRVS HENRIQUEZ Fontium Comes , qui paucis antè mensibus à REGE ablegatus in Belgium venerat , clauo manum admouere cœpit : donec eum CARDINALI ALBERTO expectatissimo Principi , Lusitanix prudentissimo Proregi , summo Pro-

uincia-

32 SERENISS. PRINCIPIS ALBERTI  
uinciarum consensu & gaudio regendum tra-  
didit.

Anno  
1596.  
11. Febr.

Venit igitur communibus omnium votis  
& honoribus (vos alloquor Senatores, qui hos  
etiam exhibuistis) acceptus ALBERTVS, eo  
animo à REGE in Nauclerum Belgicæ mille  
cladibus attritæ delectus, vt eadem regendi  
moderatione, quâ Lusitaniam reduxerat, aut  
in fide saltem nutantem continuerat, omni  
diffidentia velo amoto, fœderatos Ordines ad  
clementissimi REGIS gremium, vnde rebel-  
les exciderant, adducere niteretur. Sed is gu-  
bernacula à pace frustra Ordinibus denuncia-  
tâ exorsus, numerosum militem conscribere,  
classicum pulsare, signa in Picardiam explica-  
re. Vbi primùm Caletum ad Ictium Portum  
munitissimum oppidum, oppidanis salutem &  
fortunas pactis, occupat, & paucis pòst diebus  
arcem adhuc pertinacem expugnat modicis  
copiis, quam PHILIPPVS BONVS eius proa-  
uus, cum XL. millium exercitu ante annos pæ-  
nè ducentos expugnare non potuit. Pari cele-  
ritate Ardeam Caletensis agri propugnacu-  
lum, velut in conspectu HENRICI IV. Na-  
uarræ

uarræ Regis, qui Feram Veromandiæ urbem antè à Fontano Comite deditione acceptam, iam sextum mensem obsidebat, ad obsequium compulit. Mox geminatâ victoriâ elatum, & graue spoliis agmen aliò abduxit, & inopinatò in VVasiam adduxit; delusoque insigni stratagemate Mauritio Nassouio Fœderatorum Præfecto, Hulstum territorij istius caput, arte & naturâ validissimum, tentat, admotisque machinis post dies circiter xxx. non obstantibus recentibus auxiliis, quæ redeuntis æstus beneficio frequentia à Zelandis accipiebat, imperio subiicit. Inierat iam alterum annum, qui nonagesimus septimus erat supra sesqui-millesimum, belli fortuna Austriacis consiliis hæcenus obsecuta; cùm ARCHIDVX vix anni fores pandente Iano, omnia in proximum ver ad bellum, cùm pacem hostis detrectaret, expediri mandat: & hibernâ tempestate nonnihil sedatâ, Picardiæ metropolim Ambianum vix horæ spatio, militari astu (iuglandibus videlicet in stationarios primo manè effusis, quos prædæ intentos e mentiti agrestem habitum octodecim numero trucidabant,

E

bant,

bant, fœnarioque plaustro deciduas trabes in portis sustinebant, donec qui in insidiis latebant accurrerent) interceptit, & maximo ad proximum bellum, quod HENRICVS Rex moliebatur, apparatu potitur.

Intereà PHILIPPVS II. consilia quæ diu animo conceperat de Prouinciis his bello subleuandis, valetudine cum ætate declinante, explicanda censuit. quorum caput erat, expedire afflictis rebus nostris & Christianæ Reipub. harum Prouinciarum cessionem in Archiducem ALBERTVM. qui si gladio in omnia loca inducendus foret quæ pertinax hostis tenebat, multum sanguinis ciuilis effundendum adhuc superfuisset. Æstimabat autem pacem, etiam cum incommodo aliquo, bello potiore; & celebratissimam Scipionis sententiam, cum Antonino Pio, & ipse pius Princeps vsurpabat, *Duram esse victoriam, quæ cum ciuium iacturâ paratur.* Igitur in votis se habere significauit, Serenissimam Infantem filiam suam ISABELLAM ALBERTO Archiduci connubio iungere, ei que patrimoniales suas Inferioris Germaniæ Prouincias cum Burgundiæ



diæ Comitatu in dotem consignare. O sanctas  
 sapientissimi Regis cogitationes! ô felicem au-  
 spicato hoc nexu Belgicam! quæ velut è gra-  
 ui somno caput attollet, fulgente in his Ge-  
 minis Hesperio illo Sole. O iucundam nouo-  
 rum Principum, quidni dixero Iouis & Mi-  
 neruæ? in hoc orbe coniunctionem! Quid  
 aliud desideremus ab hac Pandorâ, quàm quæ  
 tandem per illam præstita nobis fuit, quietem?  
 In paternâ namque domo velut in prudentiæ  
 officinâ educata, paternæ etiam Monarchiæ  
 negotia obiuerat, rerum ciuiliū æquè ac  
 bellicarum gnara. Demus hoc ISABELLÆ  
 isti, quod aliis eiusdem nominis Heroinis tri-  
 buunt Historiæ; quibus vel innatum, vel raro  
 beneficio indultum, hostiles inimicitias diri-  
 mere, pacemque faustis nuptiis conciliare. Fe-  
 cit hoc ISABELLA CAROLI VI. Gallia-  
 rum Regis filia, cuiuscum RICHARDO II.  
 magnæ Britanniæ Rege sponalibus, bellum  
 conquieuit. Fecit altera ISABELLA, quæ in-  
 ter PHILIPPVM IV. & EDVARDVM co-  
 rumdem iterum Regnorum Reges, bello dis-  
 fidentes, connubiali foedere interuenit. Etiam

36 SERENISS. PRINCIPIS ALBERTI  
tertia ISABELLA hac virtute instructa, FER-  
DINANDVM Cæsarem cui nupserat, ad pacis  
cogitationes adhortata fuit. Quid autem re-  
feram augustæ PRINCIPIS nostræ genitri-  
cem ISABELLAM, PACIFICATRICIS ti-  
tulum ob conciliatam inter HENRICVM  
patrem & PHILIPPVM maritum pacem, ex-  
tulisse? Quin si altiùs hoc maximarum He-  
roinarum agmen ducendum sit, inueniemus  
inter Austriæ Archiduces, ALBERTVM Pri-  
mum, Tertium, Quintum, cum lectissimis  
ISABELLIS auspicas nuptias celebrasse.  
Quidni & Belgis auspicas fore, pacisq̃ue  
conciliatrices arbitrabimur?

Anno  
1598. in  
Septemb.

Igitur hæc cogitantem PHILIPPVM, in ipso  
nuptiarum apparatu, primùm validior mor-  
bus, dein viribus corporis exhaustis mors op-  
pressit. cuius nuntius magis animos omnium  
labefactasset, nisi pro explorato fuisset, non  
nisi compositis vtrimque pactis dotalibus,  
connubioq̃; firmato hinc emigrasse. Ad quod  
celebrandum Archidux ALBERTVS profe-  
ctionem in Hispaniam adornat, suspensâ priùs  
sacrâ purpurâ Virgini Matri quæ Hallæ mira-  
culis

culis coruscat , idque eo ipso die , qui nunc <sup>13. Julij</sup>  
 fatalis illi fuit ; & relictâ Belgicarum rerum <sup>1598. &</sup>  
 summâ ANDREÆ Cardinali FERDINANDI <sup>eodem</sup>  
 Austriæ Archiducis filio. Ne verò longâ sui & <sup>anno in</sup>  
 futuræ coniugis exspectatione Belgas remora- <sup>Sept. dis-</sup>  
 retur , magnis itineribus , quamvis cælo in-  
 commodo , Ferrariam deuectus , à Summo  
 Pontifice CLEMENTE VIII. cum Serenif-  
 simâ Hispaniarum INFANTE , illius vicem  
 cum mandato gerente Sessie Principe, despon-  
 fatur. Inde Genuam digressus in Hispaniam  
 traiecit , peractisq̃ue nuptiarum sollenniis, re-  
 ditum cum augustâ coniuge maturavit. Qui- <sup>Anno</sup>  
 bus in Belgium reuersis dum pegmata mo- <sup>1599.</sup>  
 lesq̃ue triumphales, sinceri adfectus & deside- <sup>mensē</sup>  
 rata pacis symbola præferentes, eriguntur, ac <sup>Septemb.</sup>  
 Principatus sui primordia à sollenni iureiuran-  
 do , quo subditorum iura & immunitates se  
 obseruaturos spondent, auspicantur, omnium  
 in se beneuolentiam facile conciliant, eaq̃ue  
 imperium suum communiendum decernunt.  
 Porrò Archidux ALBERTVS, qui Guberna-  
 torum numerum, Principatum adeptus, defi-  
 niuerat, non alia quàm de pace inter Christia-

nos Principes stâbiliendâ , consilia capeſſebat.  
 Superiori enim anno exploratis Francorum  
 animis , HENRICVM Regem & PHILIP-  
 PVM Catholicum arma ponere, ac commune  
 pacis bonum amplecti perſuaſerat : pertractâ  
 poſt in eandem ſententiam ELISABETHA,  
 & IACOBO deinde VI. , Britannia Regibus.  
 Reſtabat vnicum Belgium , cui conciliando  
 omnia ſtudia conferebat. Verùm apud inſo-  
 lentem & cornea fibræ hoſtem, nihil promiſ-  
 ſa , nihil monita valuerunt : ſic vt crudele v-  
 trimque bellum vſque ad exeuntem annum  
 milleſimum ſexcenteſimum ſeptimum pro-  
 tractum fuerit, Oſtendâ Flandria portu poſt  
 triennalem obſidionem , & innumeras fortiſ-  
 ſimorum virorum ſtrages , interea ad deditio-  
 nem compulſâ, & Ducis Brabantia Syluâ, ac  
 non modicâ FRISIÆ parte, vnâ cum Berckâ,  
 aliisq̃ue ad Rhenum oppidulis , à miluis Bata-  
 uicis vindicatâ.

Ceterùm concordia ſemina, aliquando per  
 ARCHIDVCES extrema belli inuitè perſequen-  
 tes iacta , poſtquam recenti tot cæſorum ſan-  
 guine irrigata fuiſſent , in Conſœderatorum  
 Ord-

Anno  
1598.

Anno  
1599.

Anno  
1604.

Anno  
1606.



Ordinum pectoribus pullulare cœperunt, & mox in gemmas, dein in flores erumpere, donec eorundem gratissimum fructum anno insequenti mense Aprili gustaremus, inducia- Anno  
1609.  
9. April.  
rum pactis in annos duodecim firmatis. quæ quidem ARCHIDV CES tantâ fidei tenacitate cum infido sapiùs hoste obseruarunt, vt ne ad latum vnguem absque religione ab ijs discedendum, aut subtilioribus consiliis illudendum, aut commodi specie insultandum putauerint. O Principes non belli & armorum, sed togæ & pacis! non tempestatis, sed quietis! Verùm dum à cædibus & sanguine Mars in Belgio feriat, Serenissimi ARCHIDV CES solliciti quâ ratione ea quæ belli rabies euerterrat, in pristinum splendorem redirent, dedicata Deo templa restitui, debitumque Religionis cultum per ditionis suæ pomœria, vbi is interciderat, resumì præceperunt: & vt Religioforum virorum cœtus, quorum precibus offensum Numen placari, quorum exemplo ad virtutem componi alij possent, celebrioribus ciuitatibus admitterentur, magnâ sedulitate effecerunt; postquam anno superiore MAT- Anno  
1607.

THIAM HOVIVM Apostolici germinis Antistitem, etiam nuper prô dolor! ereptum, excitauerant, vt conuocato Prouincialis Cleri Senatu, ruinis Ecclesiæ suæ per saluberrima decreta occurreret, eademque diplomate suo roborassent. Ipsi quoque, tum quòd imperij fulcrum pietatem erga Deum, quam à maioribus acceperunt, agnoscerent; tum quòd ad exemplum Principis orbem componi non ignorarent, adeò sanctum, adeò religiosum cultum venerationemque in PRINCIPVM PRINCIPEM, & cælo receptos ciues, eorûmque obsequiis deuota loca exhibuerunt hætenus, vt nulla sit ingenij felicitas, quæ dicendo eadem valeat exæquare. Sciunt exteræ nationes, quæ ad Aspricollis Virginis ædem votorum ergò conuolant, religiosam PRINCIPVM nostrorum in eam munificentiam. Scimus nos ipsi dum memoriâ repetimus, quot quantisque locis sacra fundamenta iecerint, largitate subuenerint, exemplo prouocarint. Vnicum illud Excalceatarum cœnobium, quod Palatio suo contiguum ab imo solo erexerunt, argumentum donat; sic vt ad alia his temporis angustis

gustiis non sit deueniendum. Atque adeò hæ virtutes in vtroque PRINCIPVM effulsere, vt dum vnus encomia prosequimur, in alterius etiam laudem excurramus.

Hoc interim ad confertissima pietatis insignia in ALBERTO addendum superesse video, quòd licet corpusculum diuturnâ inuالتitudine quassatum circumferret, cùm & cibus ad certum ei pondus à Medicis præberetur; primùm tamen ei curæ fuerit, erga sanctissimum salutis nostræ pignus Eucharistiæ Sacramentum veneratio: vt quod in hac ipsâ ciuitate, imitatus RVDOLPHVM Primum, ægro à Parocho delatum (vidistis & applausistis ciues) pedes adhuc Cardinalis deduxit; & quotannis redeunte Iulio, quando sollenni ritu Bruxellæ circumfertur, reuelato capite, cereo quæ ardente, Princeps fuit insecutus, Solisque qui tunc vehementior ardorem Austriacâ pietate superauit. Quàm multiplex Pietatis studium in PRINCIPLE hoc enituit? Quid? quòd supremo Maio annua vota facturus, ad Aspricollem æger concesserit, VIRGINIVM nouendialem cultum, debitum-

42 SERENISS. PRINCIPIS ALBERTI  
que beneficentiæ illius adfectum dedicarit! Il-  
lius etiam erga venerandas SANCTORVM  
Reliquias quàm ingens reuerentia exstitit?  
Quantâ cum estimatione sacra illa pignora ha-  
buerit, exhinc conficitur, quòd nec labori nec  
sumtibus pepercerit in diuinum hunc thesau-  
rum. Testis mihi est insigne illud Dominicæ  
Crucis fragmentum, quo nescias an alibi ma-  
ius, olim à BALDVINO Flandriæ nostræ Co-  
mite, & Ierosolymorum Rege, Hollandiæ  
Comiti, & ab hoc Egmondano Cœnobiarchæ  
donatum, Coloniâ, quòd per bella Harlemo  
translatum fuerat, postliminiò ad ipsum anxie  
multumque desiderantem delatum. Testes  
B. Martyris ALBERTI, itidem Cardinalis &  
Episcopi Leodiensis, nec non LIDVINÆ vir-  
ginis sanctæ ossa: hæc quidem Schiedamo, illa  
Rhemi singulari deuotione expetita; eorúm-  
que iusta portio, per manus Auberti Miræi  
huius Ecclesiæ Canonici, Montes Hannoniæ  
metropolim, nuperâ peste infectos, transmis-  
sa. Amplectebatur Religiosiss. PRINCEPS  
SANCTOS ipsos in istiusmodi muneribus,  
(verba sunt B. Athanasij) & tamquam magnâ  
here-

Anno  
1612.



hereditate ditatus, lætanter recordabatur per illud animarum sanctarum vestimentum, imaginem sanctitatis. Vnde & morituro sibi, collo circumponi sacratam thecam voluit; vt vel in illo agone, cuius catastrophe in æternitatem definit, illorum subsidia deuotissimè se requirere testatum faceret, quorum Reliquias possideret.

Sed lubet hîc aliam pietatis exercitationem in re aliâ commemorare. Sciebat finem Principatus publicum bonum esse, ac moderatori Reipublicæ beatam ciuium vitam, vt monet de Repub. Cicero, propositam esse oportere, vt ea opibus firma, copiis locuples, gloriâ ampla, virtute honesta sit; ideoque in animum suum omnium curam admittebat. Cumque non ignoraret, quàm necessarius in omni Republicâ esset vsus æris alieni, quantumque incommodi sentirent, qui illud commodatò acciperent à mensis ad præstandum mutuum auctoritate Principum olim institutis: primis sui Principatus initiis, quò mutuum accipientes subleuarentur, hortante MATTHIA HO-

Anno  
1600.

lorum Pastore, pensionem plurium millium  
 quę ærario soluebantur, remisit. Mox animum  
 adiecit ad eam mutuandi rationem, quę com-  
 muni bono alibi instituta est sub nomine  
 MONTIVM PIETATIS; atque id breui tem-  
 pore effecit, vt pauperes hoc adminiculo mu-  
 tuum accipiendo releuarentur, iamque noui  
 hi Montes in Belgio cacumen attollere cœpe-  
 rint: quos certè numquam adspiciemus, nisi  
 & pietatem ARCHIDVCIS respiciamus, cu-  
 ius præsidio solidantur. Sub hæc tempora,  
 Christiana & Austriaca res indiscrimen addu-  
 cenda videbatur, igne cineri doloſo per Cal-  
 uinianæ factionis facinorosos aliquot Archi-  
 mandritas variè dispersos supposito, scintillas  
 suas euomente, quę Germaniam finitimasque  
 Prouinciâs depasturę timebantur. Exuto nam-  
 que Bohemiæ diademate FERDINANDO  
 Cæsare, & Frederico Palatino in Regem per  
 vim adscito, ALBERTVS fortissimum Buc-  
 quoij Comitem, ancipiti aleâ iam pridem ino-  
 pinatò interemptum, in rebellem Bohemiam;  
 Ambrosium verò Spinolam Marchionem  
 Venafranum, Martis & Mineruæ sobolem,  
 cuius

Anno  
1618.

Anno  
1619.

cuius etiam virtuti & prudentiæ perugili ple-  
 raque posterioribus annis in Belgio feliciter  
 sub Magni P R I N C I P I S auspiciis patrata nos  
 debere fatemur , in Palatinatum ablegauit.  
 Qui dum C Æ S A R I S partes strenuè agunt,  
 subactis ijsdem Prouinciis, de Imperij hostibus  
 triumpharunt. Sic & mortuo paulò antè G V I -  
 L I E L M O Cliuix & Iulix Duce , cùm turbidi  
 Bataui partes Brandenburgicas aduersus Neo-  
 burgi Principem aperto Marte fouerent, idem Anno  
1614.  
 Ambrosius Spinola Archiducis consilio, &  
 Cæsaris imperio obsecutus, exercitum addu-  
 xit, & Aquisgrano intercepto, Doesburgum  
 ac Vesaliam opulentam & munitam urbem,  
 Batauorum armamentario destinatam , opi-  
 nione citiùs occupauit.

Prudentiam verò A R C H I D V C I S in re-  
 bus gerendis, & in consulendo virtutem vni-  
 uersi Principes suspiciebant , qui per Orato-  
 res suos ad Aulam ipsius tamquam ad aram  
 confluebant , de arduis negotiis consilia ac-  
 cepturi. Quoties ille solo interuentu suo , &  
 auctoritate , cuius à magnis meritis origo,  
 dissidentes comescuit? quoties in alterutrum

furgentes repressit? quæ subsidia afflictis vndique rebus contulit? quæ præsidia, voce ab oraculo illo delatâ, Regnis sceptrisque alienis adtulit? Etiam apud hostes sapientiæ & clementiæ opinione celebris erat, vt iam defunctum haud secûs ac Principem & parentem suum nobiscum deplorent.

Augustin.  
epist. 162.

Quantam autem erga Romanæ Ecclesiæ, *in quâ semper vixit Apostolica cathedra Principatus*, Episcopum, deuotionem & subiectionem præstiterit, etiam referrem, si non pro explorato apud omnes esset, quòd semper præstiterit vel maximam. Æstimabat certè cum CAROLO illo religione & appellatione MAGNO, vt est auctor Sigonius, *tum demum Principes ad Augustalis excellentiæ culmen proficere, si Ecclesia Dei seruis magnificentiam suam impertiant, eorûmq; studiis obsequantur. Nihilque honorificentius cum B. Ambrosio credebatur, quàm vt Imperator dicatur filius Ecclesiæ. Imperator enim bonus, inquit ille, intra Ecclesiam, non supra Ecclesiam est.* Itaque verus Ecclesiæ filius ALBERTVS, illius Pontificem tamquam vniuersalis Ecclesiæ caput, Christiani

Lib. 4. De  
Regno  
Italiz.

Epist. 32.  
ad Valentin.  
7mp.



ni populi Pastorem, successorem Petri, & Orbis Episcopum, cum piissimis æui veteris nouique Principibus, agnoscebat in omnibus, quæ ad Deum pertinebant: cum non ignoraret (quod olim HENRICVM II. Angliæ Regem <sup>Pet. Bksf. sens. epist.</sup> ALEXANDRO III. Pontifici scripsisse memoratur) *Deum extulisse illum in eminentiam officij Pastoralis, ad dandam scientiam salutis plebi eius.*

Iam de AVLA ipsâ quid dicam? Erat illa, non ut pleræque Principum, in quibus virtutum retia tenduntur, & ignea tela nequissimi iaciuntur; sed pudicitiaæ sacrarium, matronalis verecundiaæ gynæceum, modestiaæ & probitatis schola, pietatis orchestra; sic ut nec ab eâ exeundum pietatis sectatoribus, nec Arsenio alicui fuga illius ad salutem necessaria fuerit; quin potius ad eam venientes, quamuis per abrupta cupiditatum raperentur, ocyùs flagitiorum gurgite expediti, illustria optimarum actionum exempla in se admittebant.

Maximas virtutes quæ in PRINCIPE nostro fuerunt, AUDITORES, per compendium dixi: plerasque quæ in illo insigniores omisi, & inter illas eligendi ad principaliora munia siue sacra

sacra ea forent siue sæcularia, industriam & maturitatem: non enim in viliora capita iuit aliquando Archidux ALBERTVS, nec sub illo velut sub hastâ venalis magistratus pependit. Versabat quid cuiusque humeri ferrent: sanctimoniâ vitæ & prudentiæ opinione apud illum emergendum erat, & tales credebat Rebus publicis vtilissimos, quales cuiusque fama in priuatis vulgabat. In hoc æternum celebrandus, quòd duorum & viginti annorum, quibus Principatum tenuit, decursu, omnibus per Belgium primis Cathedris venerandos Antistites, Coenobiis Abbates, primis subselliis Viros dederit, qui Sacra, Religionem, Leges in pace reuererentur & assererent, in periculis tuerentur & conseruarent. In quo & hoc admodum memorabile, quòd ad Episcoporum electionem numquam procederet, nisi Pœnitentiâ expiatus, ac S. Eucharistiâ refectus, velut cum Deo, qui omnium corda scrutatur, huius ministerij & Apostolatus directionem & consilia participaret.

Atque hæc quidem omnia de Serenissimo Archiduce ALBERTO cumulatiùs à me dicta

æta sunt: quorum tamen pleraque mentibus vestris excutienda reliqui; vt iugi eorundem recordatione, dolorem, quem deinceps accepturi hîc estis, mitigetis. Ingredior enim locum illum in quem dubia humanarum rerum fors me vocat. Lamentabilis hæc pompa, quæ in aures meas incurrunt singultus, cursum laudationis sistunt. Imperuestigabili enim Dei Sapientiæ ita visum fuit, vt optimus ille piissimusque Principum extingueretur. O spei nostræ lubricitatem! heu, *quantum est in rebus inane!* Fuit ALBERTVS Princeps noster Sereniss. fuit ALBERTVS Dux noster Clementiss. AUDITORES: sed fuit, heu fuit! Quid in vitâ attollimur? Ille pro thalamo regali, communem nobiscum tumulum accepit: Ducalem trabeam, cum vilissimo & panoso Franciscani instituti cucullo, quo exanimum cadauer inuolui antè iusserat, commutavit. Exuvias superstites sine pompâ, humili sepulchro, quod ante aram sanctissimi Sacramenti, viuis in D. Gudulæ Æde Bruxellæ delegit, inferri voluit: eò felicior, quòd honores apud gratissimos, suoque funere consternatos

50 SERENISS. PRINCIPIS ALBERTI  
ciues inuenerit, quos reiecit: neque vno tu-  
mulo iaceat, sed omnium quibus præfuit pe-  
ctoribus oculisque tumuletur. Austriacas  
Prouincias, quas ad se pridem hereditario iure  
deuolutas insinuauit, vti viuens, ita & moriens  
FERDINANDO Imperatori cessit: cetero-  
rum verò quæcumque qualiacumque ea fo-  
rent, heredem ISABELLAM coniugem au-  
gustissimam, quam ad Reipub. nostræ clauum  
reliquit, testamento inscripsit: eamque etiam  
ad illam quam semper amauit & æstimauit  
Prouinciarum Belgicarum tranquillitatem,  
paucis antequam ille se ad æternam compo-  
neret horis, in quantum absque supremi Nu-  
minis, Catholicæ Religionis, & Austriacæ Do-  
mus decremento eam fieri contingeret, inte-  
gris sensibus, verbisque neruosis, & paterno  
adfectu est cohortatus. Quodque supremi lu-  
dicis, qui dicta factaque mortalium equâ lance  
pensat, & compensat, rigidam trutinam per-  
timesceret, obsecrationem sancti & tremen-  
di Sacrificij, cui etiam maximarum rerum mo-  
le oppressus, nullo vniquam etiam quo more-  
retur die præsens non interfuit, vigesies mil-  
lies



lies ad altare Domini offerri præcepit; atque ad regionem viuorum, ex hac mortalium statione, piorum precibus, supplicationibus, elemosynis, ceu salutaribus quibusdam alis subuehi, extremum postulauit. Quibus omnibus ita piè sanctèque dispositis, omnem cælo cogitationem cælo datus PRINCEPS defixit, terram quæ virtutum ipsius digna parum erat aut capax, filijs hominum relicturus. Vnde & repetitâ per eos qui nouissimis aderant, sacrorum librorum lectione, fatiscentem ægritudine spiritum, totis xiv. quibus lecto decubuit diebus, relaxabat, & sacrorum pignorum, quæ deferri ad se iussisse suprâ memorauimus, tactu recreatus, ac salutari Viatico instructus, esse inter mortales desiit, postquam inter eos annis pænè LXII. numquam sine laude fuisset. Atque id quidem eâ tranquillitate & constantiâ, quam semper, etiam dum pertinaciore cum morbo & articulari multorum annorum cruciatu conflictarètur, exhibuit: vt non mortuus, sed velut dulci sopore pressus videretur; neque nos deseruisse, sed aliò dumtaxat commigrasse, mox rediturus. Clausit labentes

13. Iulij  
Anno  
1621.

& Crucifixo hærentes oculos Inacus de Brifueilla, Theologus eximius in Ordine Prædicatorum, qui annis xxvi. à Confessionibus sacris eidem fuerat, & cui etiam vnà cum Mechliniensis Cathedræ, Sanctioris Consilij & Financiarum Primatibus, paucisque aliis, paulò antè supremæ voluntatis suæ tabulas demandauerat.

Abrumpo hoc filum, AUDITORES, ne in luctum vobiscum & lamenta abeam. Quæ debetis, PIO PRINCIPI pietatis obsequia impendite: sanctamque eius fauillam, ac venerandos cineres, non lacrymis, sed eleëmofynarum balsamo, pœnitentiæ pigmentis, & orationum sacrarum odoribus perfundite. Hæc peragentibus nunc Deo propinquus Archidux ALBERTVS annuet: vouentibus Deus adspirabit, vt dum nos regendos, dum nos regendos marito superstes, illius etiam impulsu, suscepit ISABELLA (omnium hæc vota sunt) superatis tandem pacis inimicis, securâ Christianę libertatis tranquillitate diu perfruamur.

D I X I.

AP-

## A P P R O B A T I O.


**L**AVDES & *lacryma* in *Exsequiis* *Sereniss.*  
*Archiducis* ALBERTI, *Optimi Potentissi-*  
*miq;* *Belgarum* PRINCIPIS, *pridem sollemniter*  
*celebratis in Ecclesiâ Cathedrali Antuerpiensi,*  
*dicta à Laurentio Beyerlinck, eiusdem Ecclesiæ*  
*Canonico & Archipresbytero, digna sunt qua ty-*  
*pis committantur, & diuulgentur; quòd per eas*  
*numquam satis laudandi, numquam satis lugen-*  
*di* PRINCIPIS, *in variâ virtute simulacrum*  
*aliquod exhibeatur posteris imitandum; & quid-*  
*quid ad veri Principatus decus pertinet, ab hoc*  
*PRINCIPE, qui id observauit, sumendum de-*  
*monstretur. Datum Antuerpiæ IX. Kal. Sept.*  
*Anno M. DC. XXI.*


Zegerus van Hontzum, Canonicus  
& Pœnitentiarius Antuerpiensis,  
ac Librorum Censor.

A N T V E R P I Æ,  
EX OFFICINA PLANTINIANA  
BALTHASARIS MORETI.  
M. DC. XXI.













FRI  
32996

